

革除遺事序

革除遺事何以錄懼湮也諸先正之死嗚呼烈矣大節揭揭與天日相爲昭何湮乎懼惧史之逸之也史逸之矣此其錄之也何承

二聖帝意也

文皇帝嘗謂諸先正之死曰彼食其祿自盡其心爾昭皇帝又曰若方孝孺輩皆忠臣也肆大青俾爾宗爾姻婭從輕典且俾田爾芸宅爾母渚嗚呼仁哉謂之曰忠則宜有傳不傳則何以示勸故茲錄之凡以承

二聖帝之意也疑以斬信信以斬徵信則不疑徵則益信是編也本莆田宋君端儀革除錄清江張君芹備遺錄旁采諸家傳記稍增飭之然猶有闕焉疑其所旣徵白其所未瑩則有缺于後獻君子正德庚辰仲冬嶺南後學泰泉黃佐才伯父序

革除遺事目錄

卷第一 二十二 人

方孝孺

黃子澄

齊泰

謝貴

張昺

葛誠

十

盧振

宋忠

馬宣

朱鑑

彭聚

鐵鉉

鄭華

陳彥回

葉惠仲

姚善

鄭恕

宋徵

戴德彝

盧原質

林嘉猷

程通

卷第二十四人

黃觀

王叔英

周是修

顏伯瑋

廖昇

王良

曾鳳韶

魏公冕

鄒公瑾

高巍

程本立

黃鉞

王省

劉政

卷第三二十五人

陳迪

練安

侯泰

郭任

盧迥

暴昭

毛泰

胡子昭

卓敬

茅大芳

胡閏

廖鏞

陳繼之

韓永

高翔

董庸

王度

巨敬

謝昇

周璿

黃魁

黃彦清

高不危

牛景先

甘霖

卷第四十一人

董倫

張統

徐輝祖

景清

龔泰

陳性善

平安

樓璉

劉有年

鄭居貞

魏澤

卷第五八人

沐春

王紳

王稔

高遜志

唐愚士

錢芹

王良

宋懌

卷第六十三人

耿炳文

李景隆

王純

鄭賜

黃福

茹瑞

薛崑

張顯宗

胡廣

尹昌隆

羅義

陳瑛

李友直

革除遺事畢

國家圖書館, NATIONAL CENTRAL LIBRARY, TAIWAN, R.O.C.

革除遺事卷第一

方孝孺

方孝孺字希直一字希古台州寧海人世家侯城里族甚蕃父克勤洪武初爲濟寧守學行政事名一時至正丁酉孝孺始生之夕有木星墮其所自幼精敏絕倫雙眸炯炯如電日讀書積寸人以其善屬文呼爲小韓子十五六時侍父宦游齊魯間歷覽周公孔子之廟宅問陋巷舞雩所在慨然有願學之志洪武八年父被誣逮獄上書政府願以身代不報明年以文謁宋濂濂深驚器之名流先進如胡翰蘇伯衡葉



見泰輩皆讓不敢及會父坐空印事草疏將詣闕  
伸理而父沒扶喪歸葬又明年濂致仕還浦陽復往  
卒業四載辭歸濂尋徙蜀孝孺欲往省不可爲文額  
天願輸壽以延之濂嘗欲甥之而不果亟稱其文至  
曰歐陽少師蘇長公姑置勿論其餘諸子與之角逐  
文場不知孰爲後先也然孝孺未視文藝恒以明王  
道闢異端爲已任進修所詣月異而歲不同世咸以  
爲程朱復出嘗卧病絕糧家人以告笑曰古人有三  
旬九食甌無儲粟者窮者豈獨我哉其不爲貧窶所  
動如此洪武十五年上用吳沉揭樞等薦聘至陳

說多稱旨 上謂樞曰孝孺孰與女對曰十倍於臣  
錫之宴几稍歆必正而後坐 上使人覘之喜其舉  
動端整謂 皇太孫曰此莊士也當老其才以輔汝  
試靈芝甘露論稱 旨 諭遣還家二十五年復辟  
至 上方重賞罰以其志存教化謂左右曰今非用  
孝孺時乃擢將仕佐郎漢中府學教授明年閏四月  
抵任漢中水土暴惡病癯瘠者十人而五孝孺安之  
甘蔬糲與諸生談道不倦視其色若飫萬鍾者二十  
七年春蜀獻王延之處以賓師恒曰方先生古之賢  
者也孝孺每見必以仁義道德之言陳於前 王喜

甚使之講經論文無虛晷爲名其讀書之廬曰正學  
蓋以聖賢待之也父于蜀因得訪宋濂墓卹其孤遺  
癸酉丙子校文天府三十一年太孫即位用交薦召  
爲翰林侍講日侍左右備 顧問德望素隆一時倚  
重凡將相所行惟孝孺之咨尋定官制改侍讀學士  
爲文學博士以孝孺爲之靖難師起日召之謀議詔  
檄皆出孝孺手及將敗畫策堅守誓死社稷嗣君旣  
亡 文廟納姚廣孝言召用之孝孺不屈繫獄遣人  
諭 旨終不從尋詔天下問廣孝舉代草者曰必須  
方孝孺召出自獄斬衰而見命草詔曰有死而已遂

就戮臨絕爲絕命詞曰天降亂離兮孰知其由奸臣  
得計兮謀國用猶忠臣發憤兮血淚交流以此狗君  
兮抑又何求嗚呼哀哉兮庶不我尤時年四十六宗  
族坐死者八百四十七人孝孺學術蓋源流於伊洛  
文章大類蘇氏而正論過之四方夷裔得一字寶於  
金壁寔一代之宗工也嘗與郭濬鄭居貞林右劉剛  
王紳王琦鄭楷趙象王叔英相友善皆海內名儒每  
以書往來切劘道誼聞風者莫不興起斯道爲之復  
振自號遜志齋有集四十卷所著又有周禮考次大  
易枝辭武王戒書註帝王基命錄文統宋史要言諸



書皆逸不傳洪熙初 仁廟嘗謂羣臣曰若孝孺輩皆忠臣也詔奸臣黨與從寬典方氏遺族因立祠堂以祀孝孺後知縣郭紳從而新之成化初郡人謝鐸蒐輯其遺文梓行於世

### 黃子澄

黃子澄名湜以字行袁州分宜人少從邑人歐陽貞受易周與學受尚書清江梁寅受春秋博學負俊聲游鄉校同舍避席推爲高等嘗賦寒江把釣圖及枯梅詩人爭傳誦之洪武癸亥膺貢入太學明年定科舉之制中京闈鄉試第二乙丑會試第一進士及第

第三人授翰林修撰尋兼春坊官侍 東宮講讀累遷太常寺卿 皇太孫立 諸王以叔父之尊多不遜服一日 太孫坐東角門召子澄告曰諸王尊屬各擁重兵何以制之澄以漢平七國事爲對太孫喜曰得先生謀吾無慮矣及即位時周齊湘代岷五府繼煽動上朝罷召子澄謂曰先生憶昔者東角門之言乎子澄曰不敢忘也然須密退與齊泰謀之泰欲先燕子澄曰周燕之母弟取周即剪燕之手足而燕因可圖也入白之 上遂遣曹公李景隆圍河南迫周王橚至京師遷之雲南徙代王桂於邊湘王柏聞

討狼狽闔宮焚死執齊王樽囚之京師岷王榘降爲庶人雖聖德如燕王亦捃摭其事加譙讓朝廷以子澄爲功褒賞之燕於是上書採周罪子澄指爲連坐決意討之元年三月命都督宋忠等北征七月靖難師起移檄大意言上崇信奸回離間骨肉遵太祖皇帝祖訓奉天征討罪人旣得則法周公以輔成王首以誅齊泰及子澄爲名遂破懷來雄縣遣長興侯耿炳文禦之互有勝負子澄慮師老遂言於上班師詔以李景隆爲征虜大將軍率諸將兵凡百萬以往景隆自負有文武材子澄亦薦之上寵信特

深甫行餞之江滸賜犀玉帶諸將各一賞賚無筭子澄授以指畫景隆依違而已子澄甚憂之未幾景隆攻北平城累戰俱大敗奔還京師赦不誅子澄哭諫曰景隆出師無紀度意在觀望不誅之以謝宗社何以懲將士不聽已而徐凱盛庸繼踵敗衄顧成等皆降子澄拊膺大慟曰大事去矣萬死不足贖誤國之罪矣乃賦一詩以志痛詩曰仗鉞曾登大將壇貂裘遠賜朔方寒出師無律真兒戲負國全身獨汝安論將每時悲趙括攘夷何日見齊桓尚方有劔憑誰借哭向蒼天幾墮冠聞者哀之尋用侍臣議詔謫

子澄及齊泰于遠方以快敵意其實使之募兵也時諸將猶守淮南而文廟忽已渡江矣景隆開門迎謁尋有詔執子澄等責問不服子澄遂死之命赤其族一子逃難易姓爲田經宥後乃復姓家湖廣之咸寧至今不絕近有登進士科者袁州人祀子澄于鄉賢祠倡其事者推官陳輅也

### 齊泰

齊泰應天府溧水人洪武丁卯鄉貢進士始名得後受知于高廟改賜今名筮仕禮部主事一日雷震謹身殿上躬禱于天擇九年無過官員陪祀泰與

馬乙亥爲兵部左侍郎戊寅進本部尚書嘗被召問邊將姓名泰歷數無遺又欲考諸圖籍泰出袖中手冊以進甚悉自是益承眷遇及上棄羣臣泰預受顧命輔嗣君親藩將入臨至淮安泰言于上令人齎符勒使歸國及靖難師起泰主征討之策命將出師多其籌畫嗣君惟召學士輩討論周官法度處便殿弄柔翰而已詔闡外事一以付泰泰遂移檄指斥親藩或難之泰怒曰名正言順敵乃可服是何言邪語聞太宗遂首以誅泰爲名泰以谷王漏師遁還慮遼寧二府爲變召還京

師惟遼王至遂留之於是天下勤王兵稍集始戰猶有勝負及勢不可支朝廷乃謫其官以求兵解尋召還嗣君出走秦追之不及至廣德州語在王叔英傳旣而被執秦抗辭不屈遂族誅

### 謝貴

謝貴 人洪武末黃子澄齊泰建削奪侯王之策時 燕藩稱病秦謀以虜爲名乃以貴爲北平都揮使張昺爲布政使俾誅誘王府官屬覘察王府動靜元年三月朝廷師至燕約貴先發六月貴等在城七衛并屯田軍士布於城內填溢街巷迫圍

王城外墻又以木柵斷端禮等四門 燕王聞之曰我病不出雖塞可也已而軍士登城擐甲執兵飛矢入王城四面鼓噪震動城內七月王不得已命指揮張玉朱能等師護衛勇士八百餘人應之能請先擒謝貴張昺 王曰彼防守旣嚴猝亦難擒須以計致之可也今奸臣遣中貴人來逮護衛官屬宜悉依所坐名收之就令中貴人召貴昺付所逮者則貴昺必來矣來則縛之一夫之力耳乃匿壯士端禮門內遣人召貴昺久之乃至衛從甚衆至 王門門者呵止其衛從惟貴昺得入至端禮門壯士出擒之其從者

猶未知移時貴昺不出稍稍散去將士聞二人被擒皆散走玉等率勇士捕之是夜玉等攻九門黎明已克其八惟西直門未下王命指揮唐雲單騎往諭守者皆散乃盡克九門 上親問貴昺乃知其謀出於齊黃遂上書請誅之於是靖難之師出矣貴等遂被誅死

### 張昺

張昺山西澤州人革除年間諸藩不靖廷臣建議凡藩國所在悉更置守臣必素負重望者使居其地乃擢昺爲北平布政司左布政使昺至日求 王府細

事將不爲利其吏李友直密聞於 太宗遂命燕山右護衛副千戶譚淵於端禮門執昺及都指揮謝貴等隨攻奪九門已卯七月六日也昺不屈而死其親族皆坐焚如之刑

### 葛誠

葛誠

人不知其所以進仕爲 燕府長史

靖難師未起時 王常病瘧暑中四圍皆着火爐猶自言寒三司官入視疾皆懼危篤獨誠告之以不得于 上之故因令人上變會 王遣人至京奏事齊泰等言于 上執之鍛鍊成獄即發符逮王府官屬

且約謝貴先舉兵誠許爲內應 王府人無大小誠皆籍以聞後謀不果見殺族其家

盧振

盧振 人嘗與魏國公徐輝祖同謀抗禦靖難之師事見輝祖傳

宋忠

宋忠者始爲鳳陽衛指揮使以智勇聞洪武三十一年都督齊讓討西南夷無功以忠代爲參將以虜功奏革除君尤任之元年三月詔忠調緣邊各衛馬步官軍三萬屯開平燕府護衛精壯官軍悉選隸忠麾

下護衛胡騎指揮關童等悉召入京調北平永清左衛官軍於彰德永清右衛官軍於順德以都督徐凱練兵臨清都督耿獻練兵山海諸將防於外張昺謝貴防於內約期俱發時世子及二郡王高煦三郡王高燧皆在京齊泰曰三人在此宜先收之黃子澄曰不可事覺則彼先發有名且得爲備莫若遣歸使坦懷無疑也遂遣歸尋悔遣人追之不及已而齊泰傳檄使約謝貴先發長史葛誠爲內應盡拘親藩官屬七月甲戌貴與張昺敗露見執靖難兵起忠守懷來大將俞瑄守居庸關相爲聲援已卯靖難將指揮徐

安等敗項拔其城項走依忠而居庸爲燕將所守  
太宗語諸將曰宋忠擁兵懷來則居庸有必爭之理  
因其未至可先擊之諸將皆曰敵衆我寡難與爭鋒  
擊之未便宜固守以待其至 太宗曰此非爾等所  
知當以智勝難以力論論力則不足以智則有餘彼  
衆新集其心不一宋忠輕躁寡謀狠愎自用乘其未  
定擊之必破矣癸未 太宗率馬雲徐祥等馬步精  
銳八千卷甲倍道而進甲申至懷來先是獲敵謀者  
言宋忠誑其將士云爾等家在北平城中皆爲 親  
藩所殺委屍積滿道路宜爲報讐將士聞之或信或  
否 太宗聞之乃命其家人張其舊用旗幟爲前鋒  
衆遙識旗幟又識其父兄弟無恙相呼輒應喜曰  
我家固安幾爲宋都督所誤皆倒戈來歸及戰忠餘  
衆蒼黃列陣未成 上麾師渡河鼓譟直衝其陣忠  
大敗奔入城我師乘之而入忠急匿于廁搜獲之諸  
將以得忠頗有喜色 太宗笑曰忠庸才耳得之不  
足爲喜喜則驕驕則不戒不戒則敗幾萌矣爾曹戒  
之遂誅忠子謙鎮南衛指揮使始猶編伍尋賜死年  
十六

### 馬宣

馬宣者革除中都指揮也守薊州 戊寅七月靖難師起宣謀起兵禦之已而張玉朱能來戰宣與鎮撫曾濬等閉城堅守反復諭之不下玉擁衆急攻宣率兵出拒玉遣精銳衝入其陣執而殺之并殺濬事聞革除君褒卹之

### 朱鑑

朱鑑亦都指揮也提兵守大寧戊寅十月靖難師至與戰死之事聞革除君加卹典相傳馬宣與鑑之死皆慢罵不絕口云

### 彭聚

彭聚以都指揮與同官孫太副宋忠守懷來忠之敗也與都指揮俞頊皆見執聚與太力戰死之爲靖難師所俘獲者不可勝計獨都指揮莊得一軍遁走得脫其後反間得行名將十萬吳高皆見疑而耿炳文李景隆相繼敗衄雖有大將陳暉平安歷城侯盛庸皆不能軍而亡勢成矣初十萬將陳亨謀欲降 燕而爲萬所制 太宗設竒以敗之乃作詒十萬書盛稱獎萬而極毀詆亨絨識牢密召一卒飲之酒且厚賚之而置書其衣中俾歸與萬其同獲之卒竊窺之問守者曰彼何爲者守者曰遣歸通意故得厚賚卒



跪告守者曰能為我請得偕行惟命事從不敢望賚  
守者如所言為請遂俱遣而不與賚不得賚者終不  
平至即發其事劉真陳亨搜卒衣得與上萬書遂疑  
萬執下獄籍其家其間吳高亦用此策高遂見疑有  
詔削江陰侯爵安置廣西乃專 命楊文守遼東  
文用兵無紀律 太宗素知之云

### 鐵鉉

鐵鉉河南鄧州和豐鄉人洪武間由國子生授禮科  
給事中一云初為都督府斷事奏對詳明 高廟喜  
之字之曰鼎石凡法司有疑獄未決者必以屬鉉

文廟潛邸時有訴違法狀者召至屬法司問之數日  
獄未成 高廟怒命鉉鞫之片時而成以此益愛重  
之未幾擢山東布政司叅政庚辰靖難兵起曹國公  
李景隆駐師德州鉉督漕運飛芻輓粟水陸並進未  
嘗乏缺既而軍敗南奔與叅贊高巍相遇於臨邑遂  
協謀募兵固守濟南被圍月餘不下城有被攻破者  
輒完之以計詐開門降用板候其入下之幾中其計  
靖難師知不能克越三月乃棄去事聞遣使賜以白  
金綵幣封及三代鉉入謝 上賜宴陞右布政使尋  
陞兵部尚書佐大將軍歷城侯盛庸總天下兵 文

廟踐祚用計擒至正言不屈令其一顧終不可得去其耳鼻亦不顧碎分其體至死罵方已壬午十月十七日也時年三十七父仲名母薛皆年餘八袞並海南安置子福安年十二發河池編伍康七歲鞍轡局充匠尋皆死

### 鄭華

鄭華者台州臨海人洪武丙子貢士任行人坐註誤謫東平州判官將赴任聞靖難師至時鄉人趙次進丞無錫華以妻託之馳至東平力疾戰死壬午正月也

### 陳彥回

陳彥回字士淵號納齋興化莆田人父立誠洪武間歷仕州縣後以非辜罹重刑彥回與弟彥囤俱被逮一戍滇南一戍遼東北入滇家屬數人多道亡至蜀惟彥回與祖母郭氏存焉旣而遇赦不及彥回監送者哀而釋之無所資以還乃依鄉人定遠縣尹黃積良以居遂從其姓更名禮未幾積良去位乃依南充縣丞于仲和其後閩中教諭嚴德政以明經薦爲保寧府學訓導九載考績至京侍殿陛承顧問者四十日高廟悅之擢平江知縣莅任甫十二月

高廟宴駕彥回捧香入臨給事中楊惟康等以文學廉幹薦遂陞知徽州府彥回下車甫數月政教一新士民感悅明年爲革除己卯以考覈稱職蒙賞賚甚厚其年冬郭氏卒當承重持服徼民詣闕奏乞奪情終任不報彥回哀經赴闕疏其改姓歷官情罪乞正明籍疏入報可仍從徼民前請留治郡事釋彥回遼東之後彥回復上疏終制不許詔褻事畢即蒞郡供職乃奉郭氏柩葬郡北十里北山之陽構堂數楹爲羞饋所事竣始蒞郡視事每日必哀奠如禮士民因名其山曰太守山彥回自歷官以避難亡

命更易姓名爲非禮怕悒悒不自安屢欲陳首輒自籌曰祖母年旣高萬一蹉跌將托之何所隱忍二十餘年至是始得行其志識者歸之後靖難師起彥回奉命召募義勇至京適彥回至自遼東邂逅旅邸悲喜交集郡中士人曰曹從善者偶聞而往賀焉彥回顧謂曹曰予荷朝廷再造之恩此生再生不足以報萬一予固有以處之矣到郡遣吾弟歸以治家事予身許國他不卹也子其爲我述一詞以道吾家顛末仍爲索名筆書務本二字以遺之俾知孝弟爲脩身克家之道曹唯唯固已知彥回之必殉身

矣未幾復蒞郡會靖難師將渡江彥回率義勇赴援而勢已不支文廟繼統械至京師不屈而死壬午十月十五日也時年四十七

葉惠仲

葉惠仲台州臨海人兄刑部主事夷仲嘗雅為方孝孺所知有文名惠仲亦不愧其兄時稱二葉惠仲嘗以知縣充修史官考革除二年會試後陞知府永樂元年二月廿二日戮死年六十四妻蕭氏為奴

姚善

姚善字克一湖廣安陸州人初姓李後復今姓家居

魚寨為人志行淳實學識高遠為諸生時扁讀書所曰待旦軒會稽唐志淳為之銘善工詩與唐相唱和洪武中由鄉舉歷祁門丞同知廬州重慶所至有能聲三十年擢知蘇州府初上以吳民熏染夷俗習為僭靡明法以齊之嚚者或更籍持短長賊譎蜂起號難理善洞達政體周悉人情張弛寬密各協事宜每數造請郡賢考求治道商畧民生休戚俗尚淳漓以施消息因革由是吏民顧尚禮義轉稱大治為列郡最隱士王賓獨居陋巷善往候見舍車躬詣門賓問為誰應曰姚善乃開門延語及賓報謁面府門載

拜而返善自邀還辭曰非公事不敢入也又將候韓奕奕避入太湖善歎曰韓先生所謂名可得聞面不可見也錢芹自守甚高善願見不可得將往候乃使人先道意芹對使者曰芹誠幸見公然芹民也禮不可往見于庭苟明公弘下士之風請伺月朔胥會於學宮善如期至迎芹置上坐請質經義芹曰公今有官守請姑舍是事有急於此者善問何事芹出一簡以授善竟不交一言而去視之則守禦制勝之策也善心嘉之後薦爲行軍司馬革除己卯靖難師起善畫策勤王與有勞焉壬午京師平時黃子澄者

朝廷索之急避於善所約與航海善曰在公則可在善則不可善守土之臣當與城存亡子澄去善竟伏節而死其見危授命節義可稱云長子節發戍賀干戶所幼子繼兒蘇州隨母給配保兒項兒送工部習匠善以壬午六月二十一日送問七月十日受戮時年四十三又考之太宗實錄云燕師日迫建文與方孝孺用漢破七國之策貶齊黃于外善言于朝曰有文武才畧可以扶顛濟危者反置之散地不用今事勢狼狽須急召之詢其姓名不對再二詢之則曰於今人才豈有過於黃太卿哉遂復召二人皆不至

則是善嘗在朝也然其詳不可考矣正德丙子巡撫  
都御史秦金祀之鄉賢祠

### 鄭恕

鄭恕台州僊居人由訓導舉陞直隸徐州蕭縣知  
縣靖難師至力拒焉被擒死時年五十六二女當配  
亦死之子濂湜姪韞汲皆從坐恕之戮也在壬午八  
月十七日云今僊居建祠祀恕及其二女春秋祭之

### 宋徵

宋徵人宗人府經歷嘗建議削親藩屬籍  
故靖難之師討焉事平就戮其詳不可考

### 戴德彝

戴德彝寧波奉化人洪武甲戌進士第三人入翰林  
爲編修甫三載陞侍講上諭之曰官翰林者雖以  
論思爲職然旣列近侍旦夕在朕左右凡國家政治  
得失生民利病當知無不言昔唐陸贄崔羣李絳之  
徒在翰林皆能正言讜論補益當時顯聞後世爾盍  
以古人自期待哉德彝與侍讀張信皆頓首謝由是  
感奮思所以稱上意摺遺補闕以直聲震于朝  
後改監察御史益善於其職革除年間改左拾遺  
靖難之師旣迫與太常卿黃子澄兵部尚書齊泰禮

部侍中黃觀戶部侍郎郭任刑部尚書侯泰御史大夫練子寧大理少卿胡閏宗人經歷宋徵戶科給事中韓永等日夕畫策防禦後俱死難

### 盧原質

盧原質字希魯台州寧海人世家桑洲爲巨族父中鄉稱善人母方氏孝孺之姑也原質於孝孺爲外兄而問學得於方門爲多洪武戊辰由縣學諸生登進士第三人授承事郎翰林院編修二年庚午聞父喪詔賜驛舟楮幣遣歸又四年乙亥四月陞中順大夫太常寺少卿革除間多所逮明文廟登極詔

族其家原質與其弟原朴等皆死

### 林嘉猷

林昇字嘉猷台州寧海人始師事同邑王琦琦坐累家徙雲南姻族無一人顧恤者嘉猷徒步千里追送泣涕與之訣別人高其誼後復行六千里至漢中求方孝孺而師焉方氏之門嗜學之士至者亡虛席而孝孺獨以得嘉猷及鄭叔貞爲喜勗之使進乎聖賢之道且曰匡我者二子也洪武丙子以儒士校文四川蜀獻王訝其名字不相蒙乃賜之名曰良顯後以字行由薦辟入史館爲史官累遷至陝西按察司

僉事嘗被 燕邸召入居處最久得其隱情以告孝  
孺建文君以靖難師迫遣錦衣千戶張安齎書詣  
燕許世子襲王位本嘉猷之言也內難平坐孝孺之  
黨逮至京師壬午九月丁亥被戮

### 程通


程通字彥亨徽州績溪人少有至性動必遵禮嗜學  
不倦鄉先生竒之年十四補縣學生洪武乙丑以貢  
入太學時年二十二丙寅遭父喪歸廬墓下三年哀  
慟毀形妻子至不相識戊辰復上太學時祖平謫戍  
延安年已大耄通迺上書言臣壯而無父祖猶父也

臣祖老而無子孫猶子也更相爲命今邊徼戍卒如  
林顧豈少臣祖者辭極懇切書奏 高皇帝憐之而  
持其章不下私命兵部驛召平旣至乃并召通東西  
立玉陛下顧通曰汝識此人否祖孫相持哽噎不能  
仰視 高皇帝嘆曰孝哉若人命兵部除其籍驛送  
平還鄉庚午秋通以尚書舉應天府鄉試時遣 諸  
王將兵行邊以封建策諸貢士於廷獨所對稱 旨  
親擢第一授 遼王府紀善辛未從 王闕武臨清  
壬申從之國遼西時 王府未建以祖喪免歸復廬  
墓三年服闋復任未幾 高皇帝上賓庚辰從 王



渡海南還辛巳進左長史明年始從之國荊州悉心  
輔導 王敬禮之凡一國之事咨焉府中有衛士紀  
綱者用詞事得幸通每召而答戒之會 文皇帝舉  
兵靖難遣人至荊州通草上封事數千言 文皇帝  
既正大統紀綱者以入 賀留侍歷官錦衣指揮使  
被顧問因乘間及封事遂有 詔械通詣京師簿錄  
其家通遂瘦死獄中家人發戍邊又下績溪簿錄其  
家得捕田數十畝遺書千百卷牯皮數張時黃希范  
者洪武末先出知徽州府雅與通善至是亦爲衛卒  
所捕并籍其家同赴京師而績溪程姓最衆幸使者  
仁恕罪止一房餘獲免焉有文稿百餘卷悉毀于官

革除遺事卷第一



國家圖書館, NATIONAL CENTRAL LIBRARY, TAIWAN, R.O.C.

書影通考卷一

三

革除遺事卷第二

黃觀

黃觀字瀾伯一字尚賓池州貴池人父贅于同邑許氏生觀遂從母家姓明尚書補邑諸生嘗築翠微書舍讀書其間受業於元翰林待制黃暉天兵入大都暉死之觀益砥礪以忠義自許洪武庚午貢入胄監是歲領鄉薦明年會試第一入對禦戎策大要以天道福善禍淫之機人事練兵護武之法爲言高廟嘉之擢狀元及第由翰林歷尚寶司卿禮部右侍郎革除年間改官制增侍中員次尚書以觀爲之仍掌

尚寶司事奏復其姓與方孝孺等日見親用 靖難  
師起觀奉 命草詔極論大義師既渡淮又奉命徵  
兵上游諸郡入援觀奮不顧家且行且募兵至安慶  
聞京城已定痛哭謂人曰吾妻素有志節必不肯受  
辱遂招魂葬之江上明日家僮自京逃來言當國者  
索傳國寶不得或言許尚寶已赴上游起兵矣因命  
執其妻翁氏并二女配象奴奴叱取釵釧出市酒餼  
翁遂携二女率家屬十人赴淮清橋下溺焉觀舟次  
李陽河聞報者曰上已出奔過池之逮德而羣臣奉  
新皇帝即位今三日矣自分大事已去力不能支

乃東向再拜於羅刹磯湍急處給舟人奮棹投水而  
死舟人急鈎之僅得珠系棕帽後追捕者得之以獻  
命購其屍不獲有匿之者遂族觀家且逮其姻黨百  
餘人坐繫 詔獄 仁廟初悉釋不問其謫戍邊徼  
又數十人景泰中進士邑人孫仁使遼有老卒未黻  
者給事使館亦以觀累戍遼黻故爲諸生嘗從觀游  
仁問舊事且泣且言云翁氏池口人歿時有司收其  
屍并二女具棺斂以待 朝命不報天順中池人至  
南京柳林破棺猶有存者詢之父老咸曰此黃狀元  
妻女云近知縣龔守愚於所居故址學官之西立祠

禮之或傳故尚書泰州儲巖家藏有觀集尚存

### 王叔英

王叔英字元采台州黃巖人始從母姓爲陳後復本姓洪武丁卯辟爲仙居訓導丁丑改德安府學後拜漢陽知縣 高廟晏駕之明年召爲翰林修撰上資治八策曰務學問曰謹好惡曰辯邪正曰納諫諍曰審才否曰慎刑賞曰明利害曰定法制皆援古證今鑿鑿可行且曰 太祖皇帝除姦剔穢抑強鋤梗不啻如醫者之去病農夫之去草急於去疾則或傷其體膚嚴於去草則或損於禾稼固自然之勢然體膚

疾去之餘則宜調燮其血脉禾稼草去之後則宜培養其根苗亦宜然之理也識者知爲經濟遠器 靖難師起叔英奉 命募兵廣德未幾 文廟渡江郡人皆散走兵部尚書齊泰來奔叔英以泰爲貳令州人執之旣至泰告之故乃釋泰圖再舉然知事不可爲乃沐浴具衣冠書絕命詞曰人生穹壤間忠孝貴克全嗟予事君父自省多過愆有志未及竟竒疾忽見纏肥甘空在案對之不能嚙意者造化神有命歸九泉嘗聞夷與齊餓死首陽巔周粟豈不佳所見良獨偏高蹤遠難繼偶爾無足傳千秋史臣筆慎勿稱

希賢又書於案曰生既久矣愧無補於當時死亦徒然庶無慚於後世遂自經而死時年未四十將死時以書抵祠山道士盛希年曰可葬我祠山之麓希年卒收葬之蓋希年亦台州人故托以後事尋有詔治奸黨其妻繫獄死二女俱赴井死或上其所賦詩上曰彼食其祿自盡其心耳乃置不問叔英自號靜學有靜學齋集與同郡林右方孝孺友善二人嘗序之以傳叔英沒後竟無完稿後廣德知州周瑛重修叔英墓立石爲之記少師楊士奇實叔英所薦嘗爲文以祭之曰先生之學聖賢是師先生之行綱常

是持先生之心金石其貞先生之行霜雪其明又追稱之曰先生學醇行正子道臣道終其身無一毫之苟蓋真足以當之不愧其言云

### 周是脩

周是脩名德以字行吉安泰和人洪武間舉爲霍丘訓導入見高廟問曰汝年幾何對曰年四十四家居何事曰導人爲善而已遂擢周府奉祠正革除初年有訴王府不法者官屬皆下吏是脩以嘗諫得免改衡府紀善預修纂於翰林靖難兵起是脩數論國家大計及指斥用事者誤國事用者恕共挫折

之竝不爲動 文廟既渡江駐金川門宮中悉自焚  
明日留書其家別友人江仲隆解大紳胡光大蕭用  
道楊士奇且付以後事暮入應天府學自經死時壬  
午六月十五日也越數月御史言是脩不順天命請  
加追戮 文廟曰彼各爲其主耳置不問是脩平生  
嘗曰忠臣不以得失爲憂故其言無不直貞女不以  
死生爲慮故其行無不果取先代及近世貞烈死節  
之事聞見所及史傳所遺者著一小傳名曰觀感錄  
又著類編論語二卷廣衍太極圖一卷詩經小序及  
詩譜集義三卷綱常懿範十二卷邇言四卷家訓十

二篇詩文十餘卷初亦嘗與縉士奇輩約同死後惟  
是脩能如其言士奇傳是脩事且謂其子曰當時我  
亦同死誰爲爾父作傳識者笑之

### 顏伯瑋

顏瓌字伯瑋以字行吉安廬陵人唐魯公之後以賢  
良徵授徐州沛縣知縣 文廟舉兵靖難所過郡縣  
皆歸附瓌獨以死守會曹國公李景隆奉 命出師  
駐于德州瓌率淮北民給軍餉措畫有方未嘗缺之  
辛巳六月 靖難師直擣濟寧過沛沛民竄匿瓌招  
來之九月設沛豐軍民指揮司集民壯五千人築堡

備禦尋調三千益前軍壬午正月 靖難師駐沙河  
二十二日攻沛瓌遣縣丞胡先詣徐州告急既而度  
不能支預送其子有爲使歸且告之曰汝還家白大  
人子職弗克盡矣題察院壁曰太守諸公監此情只  
因國難未能平丹心不改人臣節青史誰書縣尹名  
一木豈能支大厦三軍空擬築長城吾徒雖死終無  
憾望采民艱達 聖明夜二鼓師入東門指揮王顯  
迎降瓌冠帶陞堂南拜大哭曰臣無以報國矣乃自  
經死時年五十其子不忍去父復還則瓌已死矣遂  
自刎以從俄擒主簿唐子清典史黃謙至亦死之縣  
丞胡先收瓌父子屍葬沛南關題曰顏公墓正統初  
監察御史彭勗巡邑詢諸戶部主事致仕孟式得其  
葬處令有司起墳立祠祀之

廖昇

廖昇字

人學行最知名與王紳方孝

孺輩相友善革除間官至太常寺少卿修 太祖皇  
帝實錄學士董倫爲總裁昇及侍讀學士高巽志副  
之會 太宗平定內難昇慟哭與家人訣自縊而死  
壬午都御史陳瑛奏昇與黃觀王叔英周是脩王良  
顏伯瑋皆不順命而效死於建文計其存心與叛逆



同宜追戮之 上憫其忠不問

王良

王良字天性河南開封人居常以忠孝自許建文時任刑部左侍郎辛巳五月坐問燕人罪輕左遷浙江按察使謁岳飛墓誓曰苟媿武穆非人也內難平良聞變慟哭會命使來召良即集木司與各道印于私第嗟嘆躊躇者久之妻問其故但曰我分應死思所以處汝未決耳妻笑曰我則不難處君爲男子乃爲婦人謀乎遂命妾媿良食即抱其子欵欵如廁自投于池而死良久往覓之子匍匐池旁其鞋猶在頃之

浮起良殯殮畢即列薪于戶爲遺囑付家人令妾抱幼子往某僉事家以圖存宗祀爲託遂舉火闔室自焚死壬午九月也事聞于朝 上曰死自其分印乃吾 父皇所制不宜毀而毀特可罪耳 詔徙其家于邊其後台人陳璲私識其事每談及必流涕沾襟云正德戊寅九月按察使梁材提學副使劉瑞於公署之東曰水監亭者改爲祠以祀之

曾鳳韶

曾鳳韶吉安廬陵人洪武末年進士 高廟昇遐後爲監察御史時 藩王入覲有馳 皇道入且不拜

者鳳韶時侍班有殿上宜展君臣之禮官中乃叙叔姪之倫之言聞者駭愕 靖難師起議遣使致書請罷兵歸國無敢行者鳳韶獨請行至軍前不納取竹通節入書鼓風達之亦不報既而歸第 文廟即位嘉其直復以御史召不赴尋加侍郎召又不赴乃刺血書憤詞於襟其畧曰予生居廬陵素負骨鯁慨一死之得宜可以含笑於地下而不愧吾天祥矣囑其妻李氏子公望勿易衣遂自殺時年二十九李氏亦死於節云

### 魏公冕

魏公冕吉安永豐人爲監察御史 靖難師駐金川門有約開門迎納者公冕與大理寺丞鄒公瑾率同僚十八人即殿前毆之幾死其曰輟朝二人大呼曰請速加誅臣等義不與同生不聽次日官中自焚走或曰宜急迎附曰使吾二人改其臣節明君必所不用 文廟繼統二人皆自殺 詔夷其族

### 鄒公瑾

鄒公瑾與魏公冕同邑嘗官蜀之重慶甲戌與王紳遇于古渝紳稱其志篤才敏議論磊落可喜忠誼人也後果如其言與公冕同死靖難時

高魏

高魏山西遼州人事母蕭至孝蕭老而痼疾魏奉湯藥不懈母亡廬墓蔬食三年洪武十五年應貢入太學十七年以孝行被旌表尋授前軍都督府試左斷事十八年上疏欲墾河南山東北平兵後荒田及抑未役慎選舉惜名器數事 高廟深嘉納之後因斷事不稱 旨當罪以議賢謫戍貴州關索嶺仍許以姪代役革除君即位上疏陳情乞歸田里許之既而遼守王欽辟送赴銓曹會靖難師起魏上書借漢爲喻畧曰昔漢高帝提三尺劍滅亡道秦大封同姓分

王天下之半雖曰遠慮然卒遺文景以不治之痼疾賈誼所謂股大于腰指幾於股者也賴 文帝寬厚含忍容之尚不免斗粟尺布之謠 景帝寬厚既已弗類又輔以晁錯之深刻徑削諸侯遂挑六國之禍非命將得人民心輔漢則社稷危矣我 太祖皇帝之起與漢高同而神武過之法三代之公封建諸王必先形勢關陝百二山河昔人謂一夫當關萬夫莫開其民悍勇西鄰吐蕃故以 藩王之長秦府王之山西表裏山河地產良馬屈產之乘在焉其民剛壯所謂山西出將者也北近胡虜故以晉府王之 燕

國雖無名山大川之限其南冀州真定保定順德廣平大名諸境所謂桑土之野坦平肥沃供賦之饒不言可知其北雖曰沙漠寒涼不毛然其地廣畜馬羊其人衣皮食肉馳射是務遼金殘元藉之而興故以燕府王之四川僻在西南一隅山河阻深劉備據之虎視吳魏故以蜀府王之其餘楚湘齊兗寧遼谷代慶肅之屬以次星列比諸古制雖分封過當然揣聖意凡以護中國而屏四夷也今各府不削則隳紀綱削之則傷親親之恩有難處者賈誼曰欲天下之治安莫要於衆建諸侯而少其力力少則易使國

小則亡邪心令海內之勢如身之使臂臂之使指莫不率從真裁制諸侯良策也其在于今蓋亦師其意勿行晁錯削奪之策而效主父偃推恩之令命秦晉燕蜀四府子弟分王於齊兗吳楚潭湘齊兗吳楚潭湘分王於秦晉燕蜀其餘比類皆然則藩王之權不削而自弱矣臣又願皇上益隆親親之禮歲時伏臘使人饋問其賢如漢之河間東平者下明詔褒賞之或驕逸不法如漢之淮南濟北始犯則容再則赦三犯而不改則討之豈有不順服者哉夫天下亦猶夫人之一身也昔賈誼見漢諸侯強盛故以脛腰指

股爲喻今臣則以一身百體爲譬 皇上乃天君一心也諸藩封則五臟耳目鼻口暨手足也五臟酸甘嗜欲不同首足安逸亦異至如目好色耳好音紛紛不齊苟天君從百體之好則何以具衆理而宰萬物亦在乎制其撓吾心者而已醫書云智者能調五臟和五臟旣和不惟無腹心之疾雖疥癬亦無自生矣噫五臟和而一身安一家和而天下安孟子曰言舉斯心加諸彼而已惟 皇上鑒察焉書奏 天子竒其才遂命之從曹國公李景隆出師參贊軍務魏請以口舌排難解紛自比魯仲連累上書 文廟請罷

兵歸國累數千言不報俄而戰敗隨景隆南奔遇督餉叅政鐵鉉於臨邑遂與協謀守濟南頗著勞績會敵退與鉉燕水心亭魏爲賦以志喜相與賡和且曰公旣相幾決勝加之徐將軍盛統兵皆勇如貔虎高僉憲之糾慢宋叅軍之謀畧張都統善於掠陣王太守善於儲給王府校王肯播善於論議何憂 國難不旦夕平手又從征晉陽鴈門等處聞 京師已平乃縊死驛舍

程本立

程本立字原道嘉興崇德人少讀書不務章句聞金

華朱彥修兄弟得考亭正傳於白雲許謙乃往就學焉寓金華最久造詣日深洪武丙辰以明經秀才舉擢秦府典儀所引禮舍人同秦晉燕三府官僚召見奉天門下賜馬足楮幣有差在任五閱月以母艱去庚申服除補周府禮官丁卯從王朝京師被累謫雲南馬龍他郎甸長官司吏目畱家大梁自以一僕之任時所部百夷煽誘爲逆本立單騎深入爲書開諭逆順利害由是諸夷感悅歸順邊事以息西南當王師初靖餘孽尚驕時西平侯沐英布政使張統以本立統領守禦因自誓曰吾當以死救此一方民遂不

避艱險山行野宿自楚雄姚安以逮大理鶴慶麗江永安咸賴其撫綏安輯自是民得安業軍得着伍本立之力也戊寅奏計京師應天府尹向瑤學士董倫交章以文學優長守身廉潔薦乃徵入翰林纂修

高廟實錄陞都察院左僉都御史階中順大夫支正七品俸辛巳以失誤陪祀調除仍留翰林纂修明年實錄完調江西按察司副使未及行適靖難兵渡江逮入京本立遂自盡壬午六月十三日也官因追其恩典家無遺貲時稱爲清御史所著有巽隱集十卷僉事吳昂刊行于閩而林庭棹序之稱爲今之夷齊

云時同纂修者學士董倫禮部郎中夏止善史官錢塘高讓廬陵吳勤趙友士端孝思同郡張秉彝唐畊侍講王景修撰李貫編修吳溥楊溥楊子榮劉現侍書劉彥銘皆免于難或見用 新朝焉

### 黃鉞

黃鉞字叔揚蘇州常熟人洪武初以太學生授典史後登革除庚辰進士遷戶科左給事中以憂家居壬午歲自投琴川橋下死

### 王省

王省字子職吉水人洪武壬子領鄉薦明年詔免會

試命吏部次第擢用之省以親老乞歸養復以文學應徵 高廟親試稱旨例當殊擢省自陳才薄親老乞便遂授浮梁教諭尋丁外艱起改睢陽八年改濟陽靖難師至濟陽省爲游軍所獲從容引譬辭義慷慨衆舍之省乃陞明倫堂召諸生謂曰若等知此堂如何名明倫今日且都不說只說君臣之義一節如何遂大哭諸生亦哭遂以頭觸堂柱而死後有司立祠學宮祀之其子禎爲夔州通判亦死于賊

### 劉政

劉政字仲理蘇州人父以禮學識該博洪武初薦授

沛縣教諭政性聰睿肆力問學革除己卯以春秋中  
應天府鄉試第一時國家多難試題出可以託六尺  
之孤一章考官侍講方孝孺為時儒宗素號知人得  
其文驚曰此他日臨大節而不可奪者也批之有羣  
鳥中之孤鳳及吾當虛左以處之之語政平生忠義  
自許壬午歲聞國事感慨不食死

革除遺事卷第二



革除遺事卷第三

陳迪

陳迪字景道寧國宣城人世居麻姑山西村曾祖巨卿元江州路總管祖宥賢父仲康撫州守禦千戶所百戶迪自幼儻有志操洪武辟郡學訓導己未以通經召除翰林院編修乙丑二月陞侍讀預修大典辛未八月陞山東布政司左叅政捕蝗弭盜民甚德之甲戌十月丁內艱奪情起復辭不允乙亥二月陞雲南左布政使時普定曲靖烏撒烏蒙等處苗賊猖獗迪率土兵擊破之獻俘于朝有白金綵幣之賜



戊寅八月徵詣 行在陞禮部尚書授特進榮祿大夫庚辰水旱有 旨集議迪言刑獄未清宜勅法司擇公廉仁厚者分詣郡縣審覈獄因無令久淹致傷和氣又言逃民家業既喪且畏公私逋負之迫失今不恤必嘯聚為惡宜使有司招來之其不願歸者聽附籍種田暫免其差役則民安而盜息矣 上皆從之辛巳二月加太子少保辭所兼俸不受 靖難師逼與黃子澄等上疏陳論大計迪受 命攢運糧儲於外過家未嘗入聞變即赴京師 文廟繼統召迪責問迪謾罵不屈與子鳳山丹山等六人同日就戮

將刑鳳山呼曰父親累我迪叱使勿言因罵不絕口命割鳳山等鼻舌熬熟俾迪食之迪吐唾之益肆指斥遂俱凌遲而死有老蒼頭拾其遺骸歸葬縣之計家橋洪熙初 詔釋迪宗姻在戍者還鄉給復產業成化壬寅郡人祀諸鄉賢祠甲辰郡守復於迪故居立祠祀之

### 練安

練安字子寧以字行臨江新淦人父伯尚洪武間為起居注以直言忤旨謫廣德州同知後遷臨汀鎮安二府通判卒于官安性資英邁志操不凡幼從鄉長

者竹莊先生游竹莊命賦水竹村居有千山暮雨石  
泉通一夜春雷籟龍長之句竹莊甚奇之後游邑庠  
與金幼孜相友善嘗謂之曰子異日必爲良臣我必  
爲忠臣洪武甲子領鄉薦明年入對 大廷極言今  
日 朝廷用人徇其名而不求其實以小善而遽進  
之以小過而遽戮之因歷陳古人所以教養任用之  
道言甚剴切不顧忌諱 高廟嘉之擢第二名進士  
及第授翰林修撰安益以名節自砥礪於是聲望藹  
然中外咸以文學行義稱之未幾以母喪去位杜門  
屏跡力行古喪禮服闋陞吏部左侍郎時革除君初

嗣位安進賢退不肖多所建白與方孝孺等特見信  
用尋遷左副都御史府成改御史大夫 靖難師起  
安極論曹國公李景隆奸邪不忠一日於朝班內執  
景隆數其罪奏請誅之不聽安憤激稽首請先伏誅  
遂罷朝師旣渡淮 靖江府直史蕭用道 衡府紀  
善周是修上書論大計指斥用事者罪過書下羣臣  
及兩人議用事者怒盛氣以詬兩人安言 國事至  
此尚不容言者乎顧所論吾過有則改之無則加勉  
詬者愧而止壬午六月有 詔治好黨安不屈遂族  
誅之姻戚被逮論死者百五十一人戍遠方者又數

百人惟吉水錢氏得免及錢習禮仕于朝爲鄉人所  
持恒懷不安以告少保楊榮乘間以聞 文廟欣然  
曰使練子寧今日在此朕固當用之耳况習禮乎後  
同知王佐輯安遺文一秩序之曰金川玉屑集提學  
副使李夢陽始命有司梓之又立金川書院祀安父  
子名其堂曰浩然云

侯泰

侯泰

人累官至刑部尚書

靖難師起泰

主杭禦之策壬午二月運糧至濟寧諸郡五月復運  
糧至淮文京師已告急六月赴京行至高郵被執七  
月十日就戮弟敬祖子玘尋亦坐死

郭任

郭任鎮江丹徒在城人一云定遠人戶部侍郎戮死  
其子經亦處斬次子金山保戍廣西三女給配

盧迥

盧迥台州僊居人戶部侍郎迥人爲踈俊每飲酣善  
長謳人以爲狂及歷任顯達恭慎自將比犯難將就  
刑長謳而死聞者悲之

暴昭

暴昭

人刑部侍郎

毛泰

毛泰

人吏部侍郎

胡子昭

胡子昭字仲常一字伯尚嘉定州榮縣人舊名志高後以避嫌改世居縣之東州鄉子昭富經術性忠介方孝孺爲漢中教授講明理學往從之遊蜀獻王賦詩贈之其後由儒士被薦至京師甚重之革除年間爲史官歷陞山東按察司僉事刑部侍郎壬午九月十一日受戮年四十一闔族被擒父復初母郭氏皆年餘八十編伍子紹續繼發習匠後亦編伍獨弟志遠爲蜀府典寶匿丹稜以免近御史熊相於州治之西立祠祀之

卓敬

卓敬字惟恭温州瑞安人家卓澳後徙滄洲生而穎悟絕人讀書十行俱下一目棄不復讀亦不忘七歲時有異人見之曰奇兒也惜血不華色耳年十五六讀書寶香山性至孝晨昏之禮雖遠不廢常夜歸值風雨路迷得一牛乘之歸及門下縱之則虎也洪武戊辰中進士拜給事中好直言嘗勸上曰諸王服飾尚有擬天子者此舛之道也何以令天下邪

上笑而納之他日與同官見適八十一人上命改爲元士尋以六科爲政事本源又更爲源士後復稱給事中上疏多過直或戒以太剛則折敬謝曰敬知盡諫諍之職耳福禍非所計也爲之益力歷宗人府經歷陞戶部侍郎革除初年嘗密奏裁抑宗藩大畧謂萌而未動者幾也量時而爲者勢也勢非至剛莫能斷幾非至明莫能察奏入事竟寢文廟繼統首執敬數之曰此得非前日奏裁諸王者邪乃繫之獄遣人諷之使受官姚廣孝曰昔吳王不殺范蠡而蠡卒滅吳王衍不殺石勒而勒終殺衍使敬言誠見用

陛下豈有今日哉敬遂不屈而死臨刑神色自如經曰其面如生卓之死出於廣孝所伎上實不忍嘗歎曰國家養士三十餘年若卓敬者可謂不負君矣敬博學多能談論英發雖天文律曆地理兵刑靡不造其奧所著有遺書十卷詩文五十卷宣德間敬門人黃朝光子養正賚敬小像并其書至京師求侍講劉球作傳稱其與夷齊當並不朽且私謚之曰忠貞

### 茅大芳

茅大芳揚州泰興人博學能詩文爲宗黨所重洪武

間以儒士應辟典教淮南考績入朝 高廟召對悅  
之擢 秦府長史且勉以董子輔相之業 賜齋期  
待者甚寵大芳以爲特受隆遇懼無以稱 聖天子  
眷知之恩益自感激諫諍彌綸得大臣體未踰年秦  
國稱治因大書揭其正堂曰希董之堂以章 聖訓  
且著其志方孝孺爲之記稱其志意偉然廓大和雅  
不亢不諂深有得於正誼明道之旨革除間累官至  
副都御史及 靖難師起嘗以詩寄淮南守將忠義  
激烈聞者壯之其詩曰幽燕消息近如何聞道將軍  
志不磨縱使火龍燔地軸莫教鐵騎過天河關中事  
業蕭丞相塞上功勳馬伏波老我不才無補報西風  
一度一悲歌蓋北兵初起爲鐵鉉所拒尚未至淮時  
也壬午八月十七日坐奸黨與其子順童道壽皆戮  
死永樂四年十二月幼子文生亦誅焉

胡閏

胡閏字松友饒州鄱陽人 太祖伐陳友諒時見廟  
中詩陰記其姓名洪武中閏以有司薦辟至 闕下  
上識之曰此題詩鄱陽廟者也拜官都督府經歷  
遷右補闕革除年間爲大理寺左少卿 靖難之兵  
定京師即時坐誅戮子傳道亦誅死次子傳慶等俱

成邊衛妻汪氏女二人俱給配象奴郡志稱其忠貞  
鯁直節行聞天下云又聞諸其鄉人云閩一女後得  
歸貧無所依閩里競以錢米給之曰此忠臣女也旬  
日饒足

### 廖鏞

廖鏞無為州巢縣人祖永忠嘗從高廟平中原滅  
西蜀有功父權襲封德慶侯鏞以元勳後任散騎舍  
人見用革除間癸未四月十日鎮撫司奏送刑部就  
戮弟銘鉞及從父淮安衛指揮僉事昇俱謫戍母湯  
氏東甌王和長女也并銘女送浣衣局相傳 文皇

帝清宮三日即位召方孝孺作詔孝孺曰吾腕可斷  
此筆不可枉也 上以廖都督兩子受學於孝孺復  
令召之孝孺怒曰汝讀幾年書還不識箇是字兩子  
復命遂以軍馬收之孝孺杖而衰絰至闕下哭 上  
問之再三不荅但哀慟不置命以刀抉其口兩旁至  
耳刑之聚寶門外凡七日尚作絕命詞罵聲不絕廖  
兩子拾其遺骸葬之聚寶城門外山上葬甫畢而廖  
氏亦見收矣兩子遂逃同時刑十八人孝孺其首也  
兩子後亦就逮豈即鏞之兄弟歟出樗散雜錄

### 陳繼之



陳繼之興化莆田人登革除二年進士授戶科給事中嘗以江南僧道多占腴田蚕食百姓乃奏請僧道人給五畝餘以賦民從之文廟舉兵清君側之惡繼之間有建白因肆指斥洪武三十五年六月京師平與黃子澄齊泰巨敬韓永輩不服遂夷其族

### 韓永

韓永陝西西安人一云山西孚山人兵科給事一中云戶科癸未六月與陳迪巨敬戴德彝等被責問不屈而死廷臣同約死義者二十五人惟鄭賜黃福尹昌隆歸附

### 高翔

高翔西安朝邑人有文學節行洪武中以明經徵為監察御史高皇帝甚眷注翔翔所論奏無不關國家機事當上心者革除間文皇帝素聞翔召翔將大用之會翔服喪服入見語又忤旨乃殺翔族其家沒入其產諸給高氏產者皆倍其稅曰以世世怒罵御史也御史親戚皆配為軍同縣有程濟者有法術亦以明經為四川岳池縣學教諭岳池去朝邑數千里濟寢食俱在朝邑而日治岳池學事不廢革除間上書言某月某日西北方兵起用朝廷以為非所

宜言繫至京召入將殺之濟叩頭曰陛下幸囚臣期而無兵臣死未晚也遂繫濟詔獄已而兵果起乃赦出濟更以爲軍師護諸將北行與靖難軍先鋒戰于徐州大捷會曹國公師退 文皇帝至江上濟逸去不知所終始徐州捷時諸將乃樹碑載戰伐次第及統軍者姓名濟一日夜往祭碑人莫測其故後 文皇帝過徐州望見碑顧左右曰碑者何也或以狀對上大怒趣左右推碑一再擊遽曰止止爲我錄碑來乃按碑族誅諸將無得脫者濟姓名正用擊處得免濟曩者之祭蓋禳之也

董庸

董庸

人監察御史

王度

王度字子中惠州歸善人由明經儒士爲山東道監察御史彈劾不避權要嘗監革除二年會試壬午七月以奸黨發賀縣千戶所編伍出不遜語後坐族誅死時年四十七

巨敬

巨敬陝西平涼人戶部主事

謝昇

謝良人

曾犯靖難之師壬午

誅死父旺年七十四子咬兒年二十俱

本月初二日發金齒衛編伍

周璿

周璿

曾與抗禦 燕師壬

午內 卒戮璿死妻王氏子蠻兒是年十二月給配

姓

黃魁

人禮部侍郎

黃清

黃清

人相傳有黃清者巡撫某地 太

宗即位頌 詔至力拒之其下皆用命欲興兵力寡而死蓋即彥清也

高不危

高不危

人

壬午七月

遷其家屬至第宣戍海南衛實發習匠

牛景先

牛景先

人

革除間嘗抗禦

靖難師

京師平景先逃難出走而死永樂改元窮始奸黨齊黃等二年冬逮景先妻妾及卓敬女至 詔發教

坊司

甘霖

甘霖安慶懷寧人洪武丁卯領鄉薦仕爲監察御史  
持正不靡聞 文皇帝內靖執不從及被執遂求死  
乃遂被殺其子與孫亦不敢仕今且單弱正德末知  
府胡纘宗嘗哀而卹之且祀霖于鄉賢祠

革除遺事卷第三

革除遺事卷第四

董倫

董倫字安常本東昌恩縣人世居燕之宛平自爲儒  
生處山林間布褐藜藿已懷憂世之志學者多從之  
遊以所居貝川因稱爲貝川先生元末徵辟不出

國初擢用單縣儒士張寧洪武十五年寧以倫薦遣  
使徵之以爲春坊贊善大夫賜冠帶事 懿文皇太  
子其所陳說多忠厚之言 太祖皇帝聞而善之十

八年正月由右春坊右贊善陞左春坊大學士賜文  
綺六疋鈔五十錠會 東官晏駕二十五年出爲河

南左叅議在任盡心民事名其退食思政之堂曰後樂方孝孺爲之記嘗草封事數千言無一不愜上心者二十六年上書薦肇州吏目諸葛伯衡上命擢爲陝西右叅議三十年以註誤坐免典教滇南東宮憐而老之賜以白金若干鑑倫行至成都蜀獻王深寵之留連彌月恩禮有加賦詩八章以道行至滇凡作養成就用夏蠻夷漸摩育煦皆出于仁義道德故雖蠻童夷豎皆知向方洪武三十一年後五月建文君即位眷念東宮舊臣屢詢及之左右多言倫可用即召至京師慰勞備至拜嘉議大夫禮

部侍郎兼翰林院學士與方孝孺皆入內禁侍經筵是年七月十三日賜御書怡老堂三大字及髹几玉鳩杖各一倫上表稱謝初監察御史解縉嘗代夏長文作劾袁泰書泰銜之被泰誣斥太祖令縉十年著述始許擢用未及期會太祖賓天縉遽赴臨權臣謂赴臨非詔旨遂謫河州縉與倫書祈哀歲餘權臣黜倫言之上召縉還以爲翰林待詔其拳拳汲引此類也倫爲人質直敦厚富有文學爲時所重革除時屢懇言當務親睦不聽太宗即位時倫年八十餘上命致仕出京數日卒

張統

張統字昭季號鷓庵西安富平人父月川文行知名  
統由明經舉爲東宮侍書才識通敏 懿文皇太子  
器重之洪武十二年冬陞通政司左叅議尋出爲雲  
南布政司右叅政進左布政使凡土地貢賦法令條  
格祀神壇祠公署解字與夫上下典儀公用程度悉  
裁定之夷民心孚遠邇奠安二十年三月秩滿入覲  
上嘉其能稱爲天下第一賜璽書勞之曰曩者討平  
西南夷命官撫守爾統實先挺任今五年矣言出則  
諸蠻聽服令布則四野懽欣皆由誠信相孚克其乃

職今年來朝不待考而朕知其功出乎天下十二牧  
之首故嘉汝績復命仍治黔南汝往欽哉遂還治三  
十一年召爲吏部尚書會修 太祖皇帝實錄被  
旨試翰林之任編纂者考第高下而官之時楊士奇  
以教官徵入翰林亦在試列統讀其策獨喜曰明達  
時務有用之才不但文辭之工也以爲第一奏授王  
府審理士奇由是著名後果大用其知人之鑑如此  
壬午六月 靖難之師入京城討奸黨統與焉及  
上即位 召統與王鈿諭曰卿二人久事 皇考習  
知典故今皆老矣其解職務月給尚書半俸居 京

師視時政有戾舊制並向朕直言之無隱庶稱厚望  
老成之意統遂自經于部之後堂

### 徐輝祖

徐輝祖鳳陽人中山武寧主達之嫡長子王爲開  
國功臣第一洪武二十一年十月輝祖襲封魏國公  
始名允恭 高廟賜今名爲革除君所信任 文廟  
興靖難師以輝祖元舅也召之不爲動遂與黃子澄  
齊泰盧振張昺葛誠等通謀內難平子澄等死 上  
以中山王有大功於 國家赦輝祖不誅惟革其爵  
祿令閑住尋被繫而卒永樂五年八月 詔還其祿

米輝祖時已死其子欽仍襲魏國公

### 景清

景清陝西真寧人本姓耿以報籍而訛倜儻尚大節  
領鄉薦游國學時同舍生有秘書清求焉弗與固請  
約旦見即還曰吾縱敏能一夕盡熟之邪生不得已  
與之日往索其書曰吾不知何書初未嘗假汝也生  
忿訟於祭酒清即持所假書往見曰此清燈窓所業  
書耳即背誦徹卷及問生生無以對也祭酒叱生退  
清即以書還生曰吾以子珍秘太甚特此相戲耳初  
清赴舉時家有女爲妖憑清宿其家是夜妖不來去



即復來女詰之曰避景秀才耳且日女以聞其父父  
追及清語之故清書景清在此四字令父歸粘於戶  
而妖自是遂絕後清試甲戌禮部中第三錄詩書二  
經對 大廷賜第二人及第八翰林三載改監察御  
史丁丑春召見嘉其材能 命署都察院左僉都御  
史革除間陟左都御史會改都察院爲御史府改御  
史大夫文廟繼統方孝孺練子寧等同日死之而清  
獨委蛇侍 朝人疑焉一日清早 朝着緋衣入先  
是星者奏文曲犯 帝座甚急 上備之固疑清及  
朝清獨着緋也遂收之而得所帶劔因加詰責清不  
屈而死死之夕精英迭見嗚呼豫讓爲主報讐清豈  
其倫歟

龔泰

龔泰字叔安金華義烏人九歲而孤母傅氏躬教之  
遣就外傳日記數千百言長從宋濂之門人宗思虞  
游洪武丙子領鄉薦明年入大學奉旨閱齊王府衛  
綜畫周密衆始危之而後服之吏部策試第一除戶  
科試給事中辛巳遷都給事中壬午六月 太宗師  
渡江泰與其妻傳訣曰顧事至此我且分死矣爾第  
齋勅携幼穉以歸否則俱溺於井辱可免也言未既

火起內廷泰馳赴之道爲兵校所執見上於金川門命非奸籍者釋之泰亦釋乃遂投城以死是月十三日也泰遇事剛果有爲以孝友聞始居邑庠出息學宮之陰俄有狂者至擠泰於池幾溺弗救或請訟官泰曰被誠病狂於吾何較卒不納鄉人趙文慶者爲盜所竊跡之弗得有謂巫言其應如響叩之當得其實願泰俱往及往巫見泰瞠不能出一語衆由是服泰之正死時年三十六鄉士夫莫不悲之子永吉累官兵部右侍郎改南京大理寺卿致仕議者謂泰得釋與罪不及族必有其由或謂泰繩軍士最嚴其死蓋讐之者所爲也

陳性善

陳性善名復初以字行山陰人洪武中以春秋魁鄉試丁丑會試列名上第臚唱時上見其凝重屬目久之謂侍臣曰向唱名陳性善者君子人也賜進士出身授行人司副已而入翰林爲檢討初誠意伯劉基薨上命御史李鐸往取其遺書基子璉即出觀象玩占於石室中從鐸詣闕上之上簡精楷書者數人入便殿繙錄性善預焉上天威嚴重進見者皆惶汗甚或掣肘不成一字惟性善動止安雅旣竣書

法端妍 上嘉悅命賜以酒是時威譴叵測性善淹留竟日家人以爲必死既出莫不大驚久之超拜禮部左侍郎薦達薛正言輩前雲南布政使韓宜可方隸謫籍亦以性善言起爲副都御史 皇太孫在東宮時已熟性善名及即位一日退朝獨留性善賜之坐問以治天下之要且使書于紙以是性善感知遇盡所欲言朝廷悉從之然施行未竟輒爲權奸所更改性善朝見曰陛下不以臣愚猥承顧問臣旣僭塵上聽許臣必行今而詔書云然所謂爲法自戾陛下無以信天下矣未幾 文皇帝入靖內難 上命性

善監 景隆軍大戰白溝河敗績與大理寺丞彭與明欽 監副劉伯完指揮王賚等皆被執以歸 文皇帝志縱遣之性善朝服躍馬入于河以死詔加追戮徒其家屬于邊後悉赦還邑人吳驪爲傳其事

平安

平安一名保兒真定藁城人驍勇有名決戰善取勝庚辰四月以都指揮從李景隆戰白溝河辛巳閏三月戰藁城統卒十餘萬大敗北兵于小河壬午春充副總兵督遼東軍十萬圍通州大戰單家橋四月退至靈壁大戰爲北將朱能所擒安嘗操長鎗馳馬追

文廟幾及之會馬蹶乃弗克前至是 上問曰向  
若非馬蹶汝將何爲安大言曰刺 殿下如拉朽耳  
上壯其言嘆曰 高皇帝養下好漢子慰勞備至  
命掌北平都指揮使司事 京城既平久之 上嘗  
謂平保兒尚在耶安遂自經死少保李賢稱鐵鉉之  
死之烈曰平氏有愧焉又有北平都指揮孫狗皮者  
徐州人革除年間有戰功以忠義聞後永樂初降百  
戶

樓璉

樓璉字士連金華人嘗從宋濂 洪武中以儒士召

主宣寧仁壽二縣簿革除君嗣位屢下 詔求賢璉  
以文學舉入翰林侍講經筵官至侍讀靖難師定京  
城 文廟命方孝孺草詔孝孺哭且罵授之筆擲諸  
地曰身可死詔不可草改 命璉爲之方入見時孝  
孺受凌遲之刑未畢璉惶懼受 命歸而憤歎妻子  
問之曰得無傷方先生邪璉愧曰我受刑尚可正恐  
累及爾輩耳遂巡間一昔自經死

劉有年

劉有年字大有其先本廬陵人元季徙家沅州洪武  
中以明經起家擢監察御史學行焯焯有稱尋以辭

官養母忤旨謫通州擺站間於州故家得儀禮逸經十八篇上之 詔藏秘閣建文即位復起太平知府文廟入正大統以不肯迎駕謫雲南丙子之春與王紳遇以道義相勗 國公知其賢遣諸子從學且薦于朝及交趾平起爲交趾按察司僉事其卒也尚書黃福誅之曰江湖曾次洙泗規模文宗韓柳學本程朱其爲名流所推如此惜欠革除君一死耳

鄭居貞

鄭居貞徽州人父潛有文名國初歷仕潞州同知居貞豐頰美姿髯從父官閩中因從尚書貢泰甫游洪

武中以明經舉授鞏昌府通判陞禮部郎中甚見重高帝時終河南布政司左叅政坐累卒于南京有文曰閩南集關隴行藁歸來藁隨藁檜庭藁子孫因留居福州瓜山方孝孺之爲漢中教授也居貞以詩送之曰翩翩紫鳳雛羽翮備五彩徘徊千仞翔餘音散江海於焉覽德輝濟濟鏘環珮天門何差我羣仙久相待晨沐晞朝陽夜息飲沆瀣如何復西飛去去秦關外岐山諒匪遙啄食良自愛終當巢阿閣庶以鳴 昭代又次韻寄孝孺云闕下知名久相逢值暮春才華曾動主論議每過人漢水元通蜀台州亦近

閩何時江海上尊酒話西秦爲問天台客何時別草堂千巖空劒氣萬卷有虹光爲政慚吾拙擣辭屬子良方思歌伐木深負詠甘棠孝孺亦嘗贈之文謂其爲參政三年而去吏民以不能留爲憾事在洪武二十三年然其坐累歲月不可考蓋或因孝孺之故云


### 魏澤

魏澤字彥恩應天府溧水人有學行累遷至刑部尚書先是燕郎南下姚廣孝請曰殿下至京幸全方孝孺殺此人則天下讀書種子絕矣上納之旣至建文帝亡去遂名孝孺問曰我以周公匡成王而來成

王不在當議所立對曰殿下旣以匡王室而來成王不在當立成王之子忤旨因有滅十族等語上大怒囚于獄以廣孝言未即殺以次收捕其族黨每捕者至輒于欲服之不屈乃令盡誅之澤是時謫爲寧海典史當捕方氏時悉力保護使免于辱且資以行費後過孝孺故居有詩云筍輿衝雨過侯城撫景令人感慨生黃鳥向人空百轉清猿墮淚只三聲山中自可全高節天下難居是盛名却憶令威千載後重歸華表不勝情聞者壯澤之義

革除遺事卷第四

國家圖書館, NATIONAL CENTRAL LIBRARY, TAIWAN, R.O.C.



革除遺事卷第五

沐春

沐春字景春鳳陽定遠人黔寧王沐英長子也生未  
朞母歿鞠於外氏長歸就學年十七即侍英征西番  
明年從征以集乃俱擒其渠魁又明年從征雲南歷  
功先士卒癸亥還京師遂掌禁旅冬江西寇僭號順  
天王扇諸郡作亂春與征奮勇先登殲之乙丑秋授  
驃騎將軍僉後軍都督府事廷臣請試職上曰是  
兒我家人非他比也畀實授春剖決如流嘗錄囚于  
烈山審逆黨于蔚州奏釋各數百人壬申英薨於雲





南春往奔喪起英襲爵西平侯鎮雲南一遵父道謂屯田政爲要務歲較多寡嚴賞罰稽功乃倍饋餉以足已而緬酋暨東川夷相繼作難春命將授成筭遂皆殄平甲戌春復平越雋番寇越用蠻阿資者先年倡亂朝廷費數萬之師往往無功春又平之麓川宣慰思倫發爲其下所圖戊寅四月破刀千孟諸巖誅其罪首而釋其餘衆自是百蠻震懼不復携貳功聞授征虜前將軍使盡平其地九月十二日春薨年三十六革除君震悼加厚賻焉謚之曰惠襄春沉毅果敢明識絕倫在鎮七年闢田至三十萬餘畝復民

王紳

戶至五千餘又嘗鑿鐵池河灌涸田數萬畝民受其利云弟晟襲西平侯相傳建文君之奔也晟使人護之或時至西平侯弟然人亡有知者

王紳字仲縉金華義烏人父禕以文行重海內與宋濂齊名國初翰林待制使雲南伏節死時紳甫十三聰敏過人落筆爲文沛然不可禦鞠于伯氏緩事母何盡孝父卒哀毀踰禮未幾綬亦歿紳獨綜理生業筮筮憂患中而傑然負奇志暇日益取經史伯氏言窮其旨歸縱橫磅礴出入上下宋濂一見即器之

曰王華川其有後乎一時俊傑多自服不逮洪武二十五年蜀獻王聞其賢馳書幣聘致待以客禮俾教授蜀郡紳痛父遺骸未返丘壠白其情事王憫之給道里費以行至雲南訪求不獲遂即死所奠祭仰天號慟幾絕過者爲之泣下霑襟述滇南慟哭記以著志雲南布政張統尤重之作吊王翰林文紆其情旣還王慰勞備至蜀人無貴賤咸知敬愛建文君即位召爲國子博士遂入詞垣編摩太祖實錄與侯城方孝孺交游嘗尊孝孺爲百代儒宗勸之著書以淑來世孝孺不以爲然紳自是益嚮道德而畧文藝嘗以其父死節事聞于朝得旨贈翰林院學士謚文節開國以來文臣有謚者寔自禕始庚辰十二月丙午紳卒年四十有一有繼志齋集三十卷行于世

王稔

王稔字叔豐紳子從學方孝孺甚爲所器許妻以女逮其難之及也嘗周旋其間又嘗與孝孺表姪鄭珣至聚寶門外求其遺骸以歸葬而不可得卒坐逮繫文皇帝念祖禕死國之功特從宥免且方嚮用之而稔力以疾辭還金華讀書結屋青巖之下將終身

高遜志字士敏徐州蕭縣人元末僑寓嘉興自幼好  
私謚曰孝莊先生  
朝文纂金華賢達傳續文章正宗卒年五十九門人  
私謚曰孝莊先生

高遜志

學嗜文辭嘗侍父宦遊中吳一時文章大家如宣城  
貢師泰番禺周伯琦遂昌鄭之祐皆在巽志獲受其  
業故其爲文深純典雅成一家言年二十五爲鄒山  
書院山長洪武二年徵修元史入翰林爲編修累遷  
侍講學士建文朝兼太常寺右少卿庚辰會試與董  
倫爲考試官精於去取而名士胡廣吳溥楊子榮楊  
溥胡濙輩皆入彀中號得人焉內難旣平遜志存沒  
莫考嘗攷是科同預較藝者右拾遺朱逢吉編修史  
官吳勤葉惠仲趙友士徐旭張秉彛監試者御史王  
度俞士吉蓋皆一時之選惟葉惠仲王度死難餘皆

居位如故而徐旭者永樂初爲吏部郎中與逢吉皆預重修高廟實錄旭陞國子祭酒俞士吉永樂初拜僉都御史

### 唐愚士

唐之淳字愚士以字行紹興山陰人父肅國初應奉翰林文字有名愚士少有奇志攻學不倦年二十餘已有聲浙水父謫死臨濠辛勤扶喪歸葬追求其平生所作不憚荒遠纂錄收拾如獲金璧時時伏讀凄切人爲之掩泣然愚士亦工爲文者且善筆札酷似其父洪武中屢有薦之者謝不就曹國公李景隆好

士爲勲戚第一聞其名走使者請至家俾其子師焉征行四方皆與俱歷燕薊秦周覽前代遺蹟援筆而賦躡躑一時歲辛巳嗣君詔翰林詞臣集數千載經史中事爲書以考治亂爲鑑戒命舉優通文學士方孝孺輩以愚士薦上亦雅知其名且謂曹公之客必賢趣召至殿廷即拜翰林侍讀賜以冠帶俾與孝孺俱領修書事且同以前漢書進讀未幾病以閏三月二十三日卒時景隆久將兵于外及歸則愚士病甚不可爲矣賙卹之甚厚所著有萍居稿文斷諸書

### 錢芹

錢芹字繼忠蘇州吳縣人少負氣節欲以奇功自奮  
元季以策干諸將無所遇洪武初辟大都督府掾從  
大將軍徐達出北平絕大漠凱旋俄以例解職家居  
二十年甘貧守道爲郡守姚善所知語在善傳革除  
初年 詔求遺逸善以芹應詔召對稱 旨留中議  
事授戶部司務北陲有警署行軍斷事從征虜將軍  
咨謀會軍府遣芹入奏道病卒瀕卒猶條邊事緩急  
上執政年七十二賜棺殮歸葬黃山

### 王艮

王艮字欽止吉水人建文己卯江西鄉試第一明年

對 大廷復當第一以貌不及胡廣且廣對策有  
親藩陸梁人心不搖等語 上以爲敢言遂擢廣狀  
元而以艮次之遵洪武乙丑事例首甲皆授修撰艮  
與第三人李貫皆預焉艮聞 靖難師起居常憂但  
輒不食日就羸憊以辛巳九月卒 上憫之遣禮部  
侍郎黃觀諭祭艮之家譜所述如此而吉安志乃曰  
文廟繼統先一日羣臣多往迎附艮闔門與妻子  
訣是夜吞腦子死非其實也後廣與貫皆事 太宗  
一日上於宮中持建文時羣臣所上封事千餘通覽  
一二有干犯者命翰林院侍讀解縉等編閱關係軍


馬錢糧數目則留餘千犯者悉焚之既而從容問縉  
等曰爾等宜皆有之衆稽首未對修撰李貴進曰臣  
實無之 上曰爾以獨無爲美耶食其祿思任其事  
當國家危急之際在近侍獨無一言可乎朕非惡夫  
盡心於建文者但惡導誘建文壞 祖法亂政經耳  
爾等前日事彼則忠於彼今日事朕當忠於朕不必  
曲自遮蔽也

宋懌

宋懌字子夷金華人宋濂之孫也懌父璿中書舍人  
懌思紹文學奉母居蜀蜀獻王憫之時賜粟帛賜其  
家由是益得專於學其書益工建文君即位念濂爲  
皇考與宗皇帝舊學之臣召懌復官之於翰林爲  
侍書與劉彥銘朱思平皆見知於建文時而濂門人  
有聲稱者同郡樓璉浦陽鄭楷皆見擢用

革除遺事卷第五

華陽遺集卷五



國家圖書館, NATIONAL CENTRAL LIBRARY, TAIWAN, R.O.C.

革除遺事卷第六

耿炳文

耿炳文濠州人父君用元末從高廟取滁和積功  
爲明威將軍管軍總管其後克采石取金陵日有功  
炳文皆從焉丙申歲與張士誠戰宜興君用賈勇先  
登而死炳文代領其軍明年取廣德長沙擒士誠守  
將而降其兵會立元帥府于長興以炳文爲總兵都  
元帥守之辛丑敗士誠將李伯昇追斬五千餘級拜  
指揮使撫綏有方湖人安堵吳元年破蘇州士誠就  
擒論功召見戰門降諭曰今日之功雖古名將不



能過也陞大都督府僉事洪武初元授鎮國上將軍  
兼右率府副使二年同徐達征陝西克之留炳文鎮  
守三年正月授秦王府左相兼陝西行省右丞十一  
月封長興侯十四年輔徐達大破虜兵于北黃河復  
還陝西二十四年賜寶鏹五萬錠鈔二千錠俾造第  
鳳陽葺其先塋而追爵君用爲侯二十五年陝西兩  
當縣妖人作亂承制總兵聲討至二十七年始克之  
三十年蜀中盜起命爲征西將軍往勦平之三十一  
年鎮守遼東革除改元靖難兵起其年九月 命炳  
文佩大將軍印自遼東率衆二十萬援真定都督徐

凱領兵十萬駐河間郡督潘忠楊松營冀州先鋒至  
雄縣 太宗帥師禦之會屆中秋出炳文不虞破其  
城忠松引衆來授伏兵起忠等皆被擒因得炳文虛  
實遂長驅至真定壬戌靖難將張玉未能譚淵來戰  
炳文大敗幾爲所擒奔還滹沱河東炳文衆尚數萬  
十月復與能戰衆皆潰降副將駙馬都尉李堅都督  
甯志顧成都指揮劉遂俱被擒炳文固守燕兵攻城  
二日不能下而去炳文老将長於戰至是敗覆 建  
文君始有憂色遂名之還以李景隆代之竟至于亡  
及 太宗即位舊將惟炳文與郭英皆見用炳文後

以譴死年六十五長子璿前軍都督僉事尚 懿文  
長女江都郡主革除中爲駙馬都尉次璿龍虎將軍  
後軍都督僉事亦預親藩之征瑄散騎舍人擢尚寶  
卿皆獲罪無後

### 李景隆

李景隆泗州盱眙縣人父文忠 曹國公長公主之  
子爲開 國元勳追謚岐陽武靖王景隆以洪武十  
九年四月襲封曹國公 上嘗書體你祖禰忠孝不  
息八字以賜之使之讀書友儒生一時革布有名者  
若天台林右輩皆與交游革除君即位與魏國公徐

輝祖等俱以元勳子見任用 太宗靖難師起 命  
爲征虜大將軍帥師往伐賜通天犀帶餞之江濟遂  
乘傳至德州收集耿炳文敗亡將卒悉調各處軍馬  
五十萬進營河間 太宗語諸將曰李九江豢養之  
子寡謀而驕矜色厲而中餒忌刻而自用况未嘗習  
兵見戰陣而輒以五十萬付之是自坑之矣漢高祖  
大度知人善任使英雄爲用不過能將十萬九江何  
等才而能將五十萬趙括之敗可待矣復召報者聞  
景隆軍中事 上笑曰兵法有五敗景隆皆蹈之爲  
將政令不脩紀律不整上下異心死生離志一也今

北地早寒南卒裘褐不足披冒霜雪手足皸痲甚者  
墮指又士無贏糧馬無宿藁二也不量險易深入趨  
利三也貪而不治智信不足氣盈而復仁勇俱無威  
令不行三軍易撓四也部曲喧譁金鼓無節好諛喜  
佞專任小人五也九江五敗悉備保無能爲然吾在  
此必不敢至今須往援永平彼知我出必來攻城回  
師擊之堅城在前大軍在後必成禽矣諸將曰永平  
兵少 太宗曰城中之衆以戰則不足以守則有餘  
且世子能推誠任人足辦禦敵若全軍在城祇自示  
弱彼得專攻非策之善兵出在外竒變隨用內外掎

角破敵必矣吾出非專爲永平直欲誅九江使來就  
禽耳吳高怯不能戰聞我來必走是我一舉解永平  
圍而破九江也九江景隆小字云十一月景隆引兵  
數十萬圍北平城再戰鄭村壩大敗匿不以聞明年  
二月癸亥景隆致書 太宗詞不遜諸將皆怒四月  
丙申引兵號百萬軍德州郭英吳傑等軍真定漸移  
近北先是 朝廷命中官賫璽書賜景隆斧鉞俾專  
征伐渡江沉於水識者以爲不祥至是復賜之已而  
遇靖難師戰于白溝河三進三卻兵將漫散南奔而  
德州等處俱失守惟山東叅政鐵鉉固守濟南北兵

圍之不下緣江舟兵皆望風降揚州衛指揮王禮高  
郵等衛指揮王傑等相率納款景隆不以爲意未幾  
鎮江亦北附矣建文君憂惶不知所出景隆遂奔還  
太宗既渡江駐蹕金川門上猶使之城守景隆  
遂與谷王穗開門迎納上闔宮自焚六月十三日  
也九月初四日論功行賞封景隆奉天護運推誠宣  
力武臣特進光祿大夫柱國太子太師曹國公增祿  
一千石通前四千石子孫世世承襲賞銀四百兩綵  
段四十表裏鈔四千貫尋命充修太祖皇帝實  
錄都總裁官景隆與解縉輩秉筆多所更易其後合

王以謀逆廢爲庶人景隆亦獲罪革爵闔門被監禁  
尋下獄而死盛庸者歷城侯也既降至永樂元年十  
月都御史陳瑛論之亦削爵論死二人者縱老死牖  
下與死國難等死耳寵光猶在侈辱隨之天之報施  
果何如哉果何如哉

王純一作純

王純字仕魯河南太康人洪武間由吏部郎中爲福  
建布政司叅議陞叅政寬慎廉介民懷其惠革除年  
間遷戶部尚書靖難師至純走出城外已而歸附  
文廟登極召見之曰爾向輔建文爾朕骨肉今何顏

邪純頓首慙謝 命降布政使仍令致仕純快快成疾卒子噩官至戶部侍郎

鄭賜

鄭賜字彥嘉建寧甌寧人乙丑進士除監察御史陞湖廣布政司右叅議丁艱起復改北平布政司坐事謫安東屯革除間召爲工部尚書 太宗登極轉刑部禮部後爲侍郎趙狂讒間以憂卒 仁廟初贈太子少師謚文安

黃福

黃福字如錫平度州昌邑人由監生授項城主簿遷金吾前衛知事陞龍江衛經歷上書論六計洪武中超陞工部右侍郎用事革除時永樂初遷左侍郎尋陞尚書北京初建改北京刑部尚書交趾旣平置三司命掌布按二司印在交二十年 仁宗初召還會交人叛鎮守尚書陳洽奏請還福于交 命福同將臣帥師以往及戰失利交人擒福不忍加害送之出境召爲戶部尚書數日轉南京戶部正統初加少保仍兼尚書守備南京五年正月卒成化初贈太保謚忠宣 太宗御極時治齊黃離間之罪李景隆於上前并指福爲奸福厲聲言臣罪應死但目爲奸則

非 上置不問

尹昌隆

尹昌隆字彥謙吉安泰和人在鄉校已擅文名應貢中應天鄉試第一洪武丁丑禮闈第二賜進士及第授翰林編修改監察御史革除中大臣相訐奏者命各道鞫之同官皆畏縮昌隆獨不避一繩以法巡按閩中去貪苛理冤獄所至風裁凜然還朝上疏言當節民力謹嗜慾勤政治務正學不報既而京師地震又上疏言陰盛陽微奸臣專政所致執政者憾焉黜知福寧縣以清白公勤稱坐中使誣呪咀下獄既

得白還

京師預密議

太宗入正大統有排昌隆

者不聽改北平按察司知事時

皇儲未立武臣丘

福言皇第二子高煦有扈從功

上猶豫驛召昌隆

叩首曰長嫡承統萬世常經

上悟遂冊

仁宗爲

皇太子高煦爲漢王進昌隆左春坊中允在

東宮

屢進黨言皆嘉納漢王忿切齒譖於上又明年黜爲

禮部主事時呂震爲尚書屬官諂附者率得近惡昌

隆剛果誣其預谷庶人謀逆事昌隆死焉家亦籍沒

茹瑄

茹瑄衡州衡山人洪武中由監生官至左通政甚稱

上意稱爲內外一人舊令中外文武服勤在官者復其家 上以瑞卓異并其田塘園林一切租稅悉蠲之其叔與弟詣 闕謝及陞辭 上賜鈔十錠仍勅光祿賜酒殺借瑞詣其門餞之累遷兵部尚書太子少保革除間以尚書掌河南布政司事靖難師起瑞主兵餉及迫近京師 詔以諸王分守諸城門遣李景隆都督王佐及瑋往龍潭見 太宗瑞望風吐欵未幾遂入宮羣臣未有言瑞獨先於上前稽首勸進及即位以嘗有奉天征討功封奉天翊運守正文臣特進榮祿大夫柱國太子少保兼兵部尚書忠誠

### 羅義

伯食祿一千石子孫不世襲 詔以秦王第二女長安郡主下嫁其子鑑禮遇優渥賜賚不可勝算後乞骸骨得致仕于家尋以事逮至京師死於獄

羅義山西都司清遠衛戍卒也建文中舉兵加羅義義詣闕上書乞息兵講和其文多不載并附上 燕王書其書畧曰昔者武王崩成王幼周公乃叔父也而輔相焉管叔流言間王室周公誅之 殷下聰明英武博通經史今之周公也宜以周公之心爲心謹守燕土則天下皆知以爲周公之聖復生於今日矣

又謂古之夷齊以國相讓去隱于首陽山矧聖賢欲成天下之事必先明逆順之理成敗之機禍福之機又得天道之宜人心之安然後可今殿下以蕃國敵朝廷如遂其願愚實羞之乞早息兵書上忤旨下獄 太宗即位以義爲戶科給事中尋陞湖廣左叅議又陞前湖廣左叅議楊砥爲鴻臚寺卿以其在建文時嘗上書請敦親恩罷兵息民故也

### 薛崑

薛崑陝州閩鄉人慷慨負志操有治才口辯洪武間累官大理寺少卿革除年間大見信任辛巳閏三月兵屢敗方孝孺建議草詔令崑齎至燕軍又作宣諭數千言刊印千餘紙付崑令密散諸將士使歸心崑曰 上言 殿下旦釋甲謁 孝陵即暮下令旋師太宗叱其給已左右欲殺之 太宗曰此 天子命使也釋之而其謀不行及內難平免崑死謫廣西永樂初安南國王爲黎季犛所殺其孫陳天平自老撾來歸季犛子蒼請還君之 上命廣西總兵官都督黃中以兵五千送歸其國中舉崑爲輔行至芹站伏發劫天平去崑被虜死之

### 陳瑛



陳瑛字

人歷仕洪武至革除年爲北

平按察使坐交通

潘邸謫廣西

太宗即位首召

爲都察院右副都御史怨建文諸臣最深

上爲帝

允炆輟朝五日瑛請減之

上不從尋抗奏黃觀廖

昇王叔英周是脩王良顏伯瑋皆悖逆宜追戮之

上曰朕初舉義誅奸臣不過齊黃數輩耳後來二十

九人中如張統王純鄭賜黃福尹昌隆皆宥而用之

今汝所言數人况有不與二十九人之數者彼食其

祿自盡其心耳悉勿問蓋

上初入京城昇及是脩

自縊死觀時守安慶投江死叔英守廣德自縊死良

在富闔家自焚先是

上兵至沛縣伯瑋不肯下與

其子俱死後瑛閱方孝孺等獄詞遂簿錄觀叔英家

妻女皆將給配觀妻出通濟門先擠其二女于河遂

自沉死叔英二女皆就錦衣獄俱赴井死其違

命

忍心如此後竟以羅織苛刻得罪誅至洪熙時諸臣

宗族皆釋還田里天順中

英宗又釋建庶人之囚

孝宗朝有建言欲繼絕衷忠者於是瑛之罪益不

可掩矣

張顯宗

張顯宗汀州寧化人少喪父其母黃守志教之洪武

辛未進士第二人授編修陞太常寺丞建文中自國子監祭酒陞工部右侍郎往江西招集丁壯募民出粟太宗即位顯宗及江西布政使楊璉按察使房安僉事呂升並爲軍卒執告其罪上釋不誅謫戍興州顯宗有文學多所著述惜其功名不終一時版附之臣有政事者如大理寺卿虞謙侍郎徐宗實文學者如侍講王景司業張智修撰李貴輩難免於罪咎然文皇帝未嘗重之

李友直

李友直字居正保定清苑人始爲北平布政司吏始

以朝廷密事告于親藩語在張昺傳太宗義師旣舉遂擢用友直出理饟運入嚴城守率以命之凡事皆集稱上旨初授北平布政司右叅議旣建北京改布政司爲行部陞左侍郎初作宮室友直受命經度提督勤勞弗解改行在工部侍郎仁宗臨御嘉念舊勞陞行部尚書奉命代祀周文武成康陵及秦愍王墓旣還言關中民瘼深見嘉納賜誥命追贈二代宣德初改行在工部尚書凡有興作重役悉以委之死年七十與黃福楊士奇輩相莫逆其死也士奇爲之撰神道碑銘稱其坦夷闔敏有

長者風焉


胡廣

胡廣字光大吉水人生八歲而孤自幼好學日記數千言革除庚辰擢進士第一賜名靖除翰林修撰擢侍讀歸附 太宗復名廣拜翰林學士兼左春坊大學士爲 上所知一時制誥戒諭之文多出其手詔修五經四書性理大全 命廣總裁嘗從 上巡北虜出居庸關入沙漠王師所至功烈炳耀皆廣記述之十一年春 上幸北京再扈從出塞滅虜還旣丁艱服闋進文淵閣大學士兼春坊嘗上却封禪頌

歷數前代帝王不務國事矯誣上天卒貽天下後世笑時稱其有識自稱澹庵之後喜談忠義事嘗集文山事蹟爲傳記序之以傳卒年四十九累贈少師謚文穆與廣同時者解縉楊士奇夏原吉楊溥楊榮黃淮金幼孜蹇義輩皆攀龍附鳳爲時大臣云後大學士李東陽讀所述文山傳記以詩跋之曰狀元忠義古今傳野史何如舊史全刪述總煩胡學士姓名猶記丙申年其意最微婉百年後公論乃定大都如此

革除遺事卷第六





國家圖書館, NATIONAL CENTRAL LIBRARY, TAIWAN, R.O.C.